



**Sud Bosne i Hercegovine**  
**Суд Босне и Херцеговине**

---

Broj: SI 3 IŽ 031025 18 IŽ  
Sarajevo, 12.11.2018.godine

*Sud Bosne i Hercegovine u Sarajevu, u apelacionom vijeću sastavljenom od sudija Vesne Trifunović, kao predsjednika vijeća, Dinke Bešliagić-Čovrk i Srete Crnjak kao članova vijeća, odlučujući o žalbi političkog subjekta SBB-Fahrudin Radončić, izjavljenoj protiv Odluke Centralne izborne komisije Bosne i Hercegovine broj: 05-1-07-1-1274-58/18 od 05.11.2018.godine, radi povrede pravila izbornog procesa, u nejavnoj sjednici, održanoj dana 12.11.2018.godine, donio je*

**RJEŠENJE**

**Žalba se odbija.**

**O b r a z l o Ź e n j e**

*Odlukom Centralne izborne komisije Bosne i Hercegovine, broj i datum navedeni u uvodu izmijenjena je (III put) Odluka broj: 05-1-07-1-1274-1/18 od 22.10.2018. godine o utvrđivanju i objavljivanju rezultata Općih izbora u Bosni i Hercegovini na način što je stavom (1) izuzetno od utvrđenih rezultata u odluci broj: 05-1-07-1-1274-1/18 od 22.10.2018. godine o utvrđivanju i objavljivanju rezultata Općih izbora u Bosni i Hercegovini 2018. godine u dijelu Izvještaja o rezultatima glasanja za nivo 400 Predstavnički dom Parlamenta Federacije Bosne i Hercegovine:*

*- za političkog subjekta 00877 – Naša stranka, 5. mandat na kompenzacijskoj listi na kojem se nalazi kandidat Bukarić Želimir (Ostali) dodjeljuje se kandidatkinji istog političkog subjekta sa **dopunske kompenzacijske liste** iz izborne jedinice 11-nivo 411 Melank Miomirki (Srpkinja).*

*Žalitelj je blagovremeno uložio žalbu ističući da je pobijana Odluka CIK-a u suprotnosti sa odredbom člana 10.6 (3) Izbornog zakona BiH, jer politički subjekt Naša stranka na svojoj kompenzacionoj listi nije imala dovoljno kvalificiranih kandidata iz reda relevantnog konstitutivnog naorada (srpskog naroda), s obzirom da SBB na svojoj listi ima takvih kandidata, pa nije moglo doći do situacije da na bilo kojoj kompenzacionoj listi nema kandidata iz reda srpskog naroda. Nezakonitim postupanjem CIK BiH da član 9.7a Izbornog zakona nije primjenjiv u konkretnom slučaju i da odredba člana 1.1. navedenog*

zakona konstatuje samo postojanje principa, SBB je pretrpio štetu. Ukazuje na jasne norme koje su uspostavljene odredbom člana 9.7a koja se primjenjuje kada stranka na svojoj kompenzacionoj listi „nema više kandidata“, a član 10.6 (3) kada nema dovoljno kvalificiranih kandidata iz reda relevantnog konstitutivnog naroda. Osim toga osporena odluka je protivna odredbama 1.2 Ustava BiH, te člana 6 Evropske konvencije.

Predlaže da se žalba usvoji i naloži CIK BiH da nedostajuće mandate iz reda srpskog naroda i to mandate koje je dodijelio Miomirki Melank i Goranu Opsenici raspodjeli u skladu sa odredbom člana 10.6(3)

U odgovoru na žalbu Centralna izborna komisija Bosne i Hercegovine predložila je da se žalba odbije kao neosnovana.

Nakon što je ispitalo osporenu odluku u granicama žalbenih razloga, vijeće Apelacionog odjeljenja Suda Bosne i Hercegovine je zaključilo:

*Žalba nije osnovana.*

Odredbom člana 10.1 Izbornog zakona BiH stav (3) je propisano da će najmanje četiri člana svakog konstitutivnog naroda biti zastupljeno u Predstavničkom domu Parlamenta Federacije BiH, te je odredbom člana 10.6 stav (2) propisano da ukoliko svaki od konstitutivnih naroda ne osvoji minimalan broj od četiri mandata, naknadni kompenzacijski mandat dodjeljuje se kandidatu relevantnog konstitutivnog naroda sa kompenzacijske liste političke stranke ili koalicije koja je osvojila najveći broj glasova i koja na listi ima još kvalificiranih kandidata iz reda relevantnog konstitutivnog naroda.

U smislu naprijed navedenih odredbi, Apelaciono vijeće je utvrdilo nespornim da je CIK BiH potpuno osnovano utvrdio da u slučaju da od ukupnog broja od 98 zastupnika koji se biraju u PDPFBiH nije izabrano minimalno četiri poslanika iz svakog od konstitutivnih naroda, postoji zakonska obaveza za CIK BiH da primjenom principa dodjele kompenzacijskih mandata izvrši naknadni izbor i imenovanje poslanika po principima Izbornog zakona, a kako bi se na zakonit način popunio PDPFBiH. Iz stanja spisa, što ne spore subjekti, proizilazi da je u sastav ovog tijela nije izabran dovoljan broj srba. Zbog toga, CIK BiH je nužno morao primijeniti odredbe o dodjeli kompenzacijskih mandata. U tom smislu, takva dodjela mandata se implementira naknadno, i to nakon ponovnog prebrojavanja glasova.

Dalje, odredbom člana 9.7 Izbornog zakona BiH propisano je da se kompenzacijski mandati koje osvoji politička stranka ili koalicija u skladu sa članom 9.6 ovog Zakona dodjeljuju jedan po jedan kandidatima koji nisu izabrani sa liste kompenzacijskih mandata u političke stranke ili koalicije, od vrha liste pa sve dok mandati ne budu raspodijeljeni ili dok se lista ne iscrpi.

Odredbom člana 9.7a propisano je da izuzetno od odredbi člana 9.6 i 4.24 Zakona, politička stranka i koalicija koja na kandidatskoj listi za

*kompenzacione mandate nema više kandidata, a ima još osvojenih mandata za raspodjelu, može po obavještenju CIK-a BiH u roku od 48 sati na propisanom obrascu dostaviti dopunsku kandidatsku listu za kompenzacione mandate u skladu sa članom 4.24 stav (2) Zakona.*

*Kako je dana 01.11.2018. godine Naša stranka dostavila dopunsku kompenzacijsku listu, a CIK-a BiH Odlukom od 05.11.2018. godine ovjerila dopunsku kandidatsku listu i kandidatkinju političkog subjekta NAŠA STRANKA (00877) za dodjelu kompenzacijskih mandata za Opće izbore 2018. Godine za izbornu jedinicu Predstavnički dom parlamenta F BiH (400) Melank Miomirku, što je u skladu sa navedenim relevantnim odredbama Izbornog zakona BiH, to je pobijana odluka CIK BiH pravilna i zakonita.*

*U vezi sa navodima vezanim za navodno izjašnjenje Gorana Opsenice, Apelaciono vijeće ukazuje da predmetni kandidat uopšte nije bio predmetom Odluke, pa Sud u tom pravcu nije niti razmatrao žalbene navode.*

*Iz navedenih razloga apelaciono upravno vijeće Apelacionog odjeljenja Suda Bosne i Hercegovine, nalazi da je pobijana odluka Centralne izborne komisije Bosne i Hercegovine pravilna i zakonita a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“ br. 19/02 do 74/10) valjalo odbiti.*

*Predsjednik vijeća  
Sudija  
Vesna Trifunović*